



本著作以創用CC「姓名標示-非商業性-禁止改作」4.0國際授權條款釋出。  
詳細授權條款，請至 <http://creativecommons.org/licenses/by-nc-nd/4.0/>。  
資料來源：教育部電子報「閱讀趣聞客語」專欄 <http://epaper.edu.tw>。

客（南四縣）／文史／☆☆★★

## 鬧熱个婚禮

討親，係人生个大事，以前人講：「有錢無錢，討一個姐仔好過年。」過年時大家團圓，單身哥仔看別人雙雙對對，總會羨慕。今時代變地，後生人讀大學、讀研究所，出社會个年紀過多地；尋頭路又毋係一擺就做得尋有合得著自家興趣个，一年愛換二十四個頭家。頭路無穩定，就算有戀愛个對象，也毋敢忒早結婚。根據內政部統計，舊年結婚个平均年紀，細佬仔係三十四歲零，細妹仔係兼兼三十二歲地。老人家係想愛摘孫仔，斯愛等蓋久哦！

今个民法規定結婚改做登記制，毋係以前有公開儀式請人客就算數地。毋過，恁仔噶分後生人越至方便，有結婚打算个成年人，做得直接去戶政機關登記，各種个儀式全省下來。幾下年前，偌个朋友个妹仔，同佢討戶口名簿寄上去臺北，佢毋知厥妹仔愛做麼个，問啊去正知，厥妹仔愛登記結婚，佢譴啊差一息昏核！看等妹仔漸漸大地，不時恁想鬧熱个婚禮愛仰仔辦，斯愛歸美濃老屋家敬祖、在禾埕請人客，抑係在高雄尋一間大飯店仔，風風光光嫁妹仔。雖然知啊妹仔有交往个對象，哪知佢等決定婚事，全全無分大人儕參與。

準備結婚正式有複雜，有兜人想著這兜禮俗就喊毋敢地。上隻月，高雄市客委會舉辦鬧熱个客家婚禮，分新人省使按算該兜微細个事情，算係集團結婚个一種，又係用客家古禮來進行，嶄然有意義。新人著个新娘衫，全係用藍衫改良設計過个，共樣有著出新娘个一等身材同高貴个氣質。照古禮，婚禮在臨暗仔開始，男方討親个隊伍有客家八音、添丁發財燈、拖青、帶路雞、扛槓，在街路項遊行，盡鬧熱！去到女方个祖堂進行拜祖、上燈个結親儀式，新娘愛同夫家个長輩插頭花，又搭同新娘公共下向長輩親戚奉新娘茶。

公證結婚盡省事無毋著，後生人辦新式个舞會乜做得。但係古禮裡背，有幾多先人个智慧同眾人个祝福正得！討親恁大个喜事，難免驚怕在路項堵著煞氣，用吹笛同鑼鼓个聲音、拖青个生豬肉，做得避煞。上燈就係添丁，希望多子多孫，帶路雞表示成家地，這兜都係愛分一個新成立个家庭祝福。槓裡背過定个禮，有人講係六大禮，也有人講係十二大禮，有喜餅、炮竹、聘金、手環、戥鍊這兜，係對這件婚事个重視。插頭花、扛茶、食新娘茶、砵紅包，係利用這個機會，來認識新人、結好緣，接受新人加入家族，係家族和樂个開始。

還單身个男女，係有結婚个打算，做得參考這恁有意義个客家古婚禮哦！

作者：吳秀梅

### ☆詞彙學習☆

【羨慕】xien mu：羨慕。

【摘孫仔】nam` sun` e`：抱孫子。

【算數】son sii：認定有效。

【譴】kien`：生氣。

【恁想】men` xiong`：想、思考。

【省使】sang` sii`：省下工夫。

【微細】mi` se：細微瑣碎的。

【上燈】song` den`：吊掛正廳屋梁燈。

【過定】go tin：行聘禮。

【插頭花】cab` teu` fa`：婚禮時，新娘為新郎的女性長輩在頭上插花。

【手環】su` kuan`：手鐲。